

Decreto 428/1993, do 17 de decembro, polo que se regula e refunde a normativa en materia de formación náutico-pesqueira.

A aportación do sector pesqueiro á actividade económica e á dinámica social en Galicia é dunha magnitud e importancia que trascende o feito sectorial para afectar a toda a sociedade, por iso cómpre atender as súas demandas sociais no referente á mellora das condicións de traballo, sobre todo nunha época de profundas transformacións na estrutura da pesca.

Estas melloras das condicións de traballo supoñen, ademais da modernización da flota, da incorporación de novas tecnoloxías e da adopción de medidas de seguridade e hixiene no traballo, unha revisión e mellora da formación náutico-pesqueira, especialmente na súa vertente cualitativa.

Existe un excesivo número de normas reguladoras da formación náutico-pesqueira, nacidas por esixencia das directrices marcadas pola Organización Marítima Internacional e os convenios internacionais ratificados polo Estado sobre capacidade profesional dos titulados e sobre seguridade da vida humana no mar (Sevimar), as cales esixen que a formación dos pescadores e mariñeiros estea sometida a condicionantes específicos que non se dan na formación doutras profesións.

Malia esa abundancia normativa, unhas veces detallada con extrema precisión e outras escura, algúns dos seus preceptos quedaron obsoletos, polo que se fai necesaria a súa revisión e refundición co fin de contar cunha normativa actualizada e clara que facilite un normal desenvolvemento da formación do sector.

Por último, a complexidade das ensinanzas náutico-pesqueiras e a necesaria coordinación, non só coas administracións públicas competentes na materia, senón tamén entre os propios centros formativos desta Comunidade Autónoma, demandan a creación dunha unidade de inspección técnica, que actuará no marco das competencias transferidas por medio do Real decreto 4.189/1982, do 29 de decembro.

Por todo o exposto, por proposta do conselleiro de Pesca, Marisqueo e Acuicultura, oído o Consello Galego de Pesca na súa sesión do día trinta de novembro de mil novecentos noventa e tres, e trala deliberación do Consello da Xunta de Galicia en reunión do día dezasete de decembro de mil novecentos noventa e tres,

DISPOÑO:

TÍTULO I

DA FORMACIÓN NÁUTICO-PESQUEIRA

Capítulo I

Das ensinanzas náutico-pesqueiras.

Artigo 1º

É obxecto do presente decreto a regulación das ensinanzas náutico-pesqueiras, que son as que cualifican

para o exercicio das profesións relacionadas co mundo do mar e a utilización dos seus recursos.

As especialidades que as integran desenvólvense tanto en réxime académico regrado como de formación non regada, de acordo cos distintos niveis profesionais.

Artigo 2º

As ensinanzas náutico-pesqueiras son as que se recollen no anexo I e se relacionan a seguir:

a) Ensinanzas regadas náutico-pesqueiras, que facultan para a obtención de títulos profesionais seguintes:

- Títulos profesionais de pesca marítima.
- Títulos profesionais de mecánica naval.
- Títulos profesionais de transporte de cabotaxe.
- Títulos profesionais de electricistas navais.

b) Ensinanzas non regadas náutico-pesqueiras, nas que se inclúen as especialidades seguintes:

- Especialidades de mergullo e actividades subacuáticas.

—Especialidades de acuicultura.

—Especialidade de seguridade marítima.

Artigo 3º

Dentro das ensinanzas regadas náutico-pesqueiras encádranse as que facultan para a obtención dos certificados para a obtención dos títulos profesionais habilitantes para o despacho e mando de embarcacións dedicadas á pesca e cabotaxe, nos diferentes niveis definidos pola normativa estatal que se recollen no anexo I do presente decreto.

Artigo 4º

Dentro da especialidade de ensinanza non regada de acuicultura encádrase a que facilita para a obtención dos certificados e acreditacións en técnicas de cultivos mariños, correspondentes a mariscador a pé, acuicultor e especialista en cultivos mariños definidos, segundo o disposto nos artigos 6, 7 e 8 do presente decreto.

Artigo 5º

Dentro da especialidade de ensinanza non regada de mergullo encádrase a que facilita para a obtención dos certificados para a obtención dos certificados para a obtención dos títulos profesionais habilitantes para o desenvolvemento de traballos submarinos definidos pola normativa estatal e recollidos no anexo I do presente decreto.

Artigo 6º

1. Para os efectos do disposto neste decreto enténdese por mariscador a pé toda persoa física que se dedica de xeito continuado á recollida ou captura de mariscos procedentes de bancos naturais da zona intermareal.

2. A cualidade de mariscador a pé acredita a capacidade profesional para realiza-las seguintes accións:

—Recoller ou captura-lo marisco procedente de bancos naturais da zona intermareal.

—Domina-las técnicas e artes usuais na recollida ou captura de mariscos e outras accións para o coidado e mellor aproveitamento do recurso, tales como limpeza, rareo, sementeira, emendas do substrato, etc.

—Realiza-los labores que lle correspondan nun plan de explotación dun banco marisqueiro.

—Desenvolve-la súa actividade dentro das normas vixentes, mesmo referidas a primeira venda.

3. A condición de mariscador a pé acredítase mediante o certificado de mariscador, que será expedido pola Consellería de Pesca, Marisqueo e Acuicultura por petición do interesado.

Artigo 7º

1. A cualidade de acuicultor acredita a capacidade profesional para responsabilizarse da execución e realización, directamente ou non, das instruccións recibidas do especialista, director de produción ou similar, referentes ás seguintes accións:

—Mantemento e uso de instalacións xerais.

—Técnicas usuais de explotación dos recursos mariños.

—Labores tradicionais nos cultivos.

—Coordinación dos acuicultores e mariscadores.

2. A condición de acuicultor acredítase mediante o certificado de acuicultor, que será expedido pola Consellería de Pesca, Marisqueo e Acuicultura por petición do interesado.

Artigo 8º

1. A cualidade de especialista en cultivos mariños acredita a capacidade profesional para te-la responsabilidade de encargado xeral na explotación de bancos naturais e de establecementos de cultivos mariños ou auxiliares, segundo a súa especialidade e baixo as órdes directas do director de produción ou similar, sempre que así o requira o volume, entidade ou características do banco natural ou establecemento.

2. A condición de especialista en cultivos mariños acredítase mediante o certificado de especialista en cultivos mariños, que será expedido pola Consellería de Pesca, Marisqueo e Acuicultura por petición do interesado.

Capítulo II

Dos centros e o profesorado.

Sección primeira

Dos centros.

Artigo 9º

1. Os centros oficiais de formación náutico-pesqueira son os que imparten as ensinanzas conducentes á ob-

tención dos certificados profesionais que facultan para o despacho e mando das embarcacións dedicadas á pesca ou cabotaxe, así como para o exercicio das profesións de acuicultura e mergullo, nos niveis que regulamentariamente se determinen.

2. Serán funcións destes centros, ademais das conducentes á obtención das certificacións profesionais náutico-pesqueiras, as seguintes:

a) O desenvolvemento das actividades que complementen as ensinanzas impartidas e lles proporcionen unha formación máis completa ós alumnos, procurando servir, ó mesmo tempo, ó medio educativo nos aspectos culturais, deportivos e creativos.

b) A prestación de servicios complementarios ás ensinanzas náutico-pesqueiras.

c) A encomenda de xestión de funcións a competencia das cales lles corresponda a outros organismos, entidades ou administracións públicas cando polo seu interese e disponibilidade de medios idóneos se considere oportuno.

d) Calquera outra que lle recoñeza a Consellería de Pesca, Marisqueo e Acuicultura.

Artigo 10º

1. Os centros oficiais de formación náutico-pesqueira da Consellería de Pesca, Marisqueo e Acuicultura expedirán os certificados de aptitude para a obtención de títulos profesionais que habiliten para o exercicio da profesión, tanto de alumnos oficiais e libre matriculados nestes centros como dos alumnos que reciban ensinanzas nos centros adscritos.

2. Así mesmo, os citados centros expedirán os certificados de aptitude nos cursos de formación non regada.

Artigo 11º

Os centros propios da Consellería de Pesca, Marisqueo e Acuicultura especializados en formación náutico-pesqueira que poden imparti-las correspondentes ensinanzas son os seguintes:

—Instituto Politécnico Marítimo-Pesqueiro do Atlántico de Vigo.

—Escola Oficial Náutico-Pesqueira de Ferrol.

—Escola Oficial Náutico-Pesqueira de Ribeira.

—Instituto Galego de Formación en Acuicultura da Illa de Arousa.

Artigo 12º

1. No Instituto Politécnico Náutico-Pesqueiro e nas escolas oficiais náutico-pesqueiras impártense as especialidades náutico-pesqueiras, profesión máquinas e profesión ponte, nos niveis que se lles asignen de acordo cos seus equipamentos e cadros de persoal de profesorado.

2. No Instituto Galego de Formación en Acuicultura impártense as especialidades de acuicultura para a obtención dos certificados de acreditación definidos no artigo 4 do presente decreto.

Artigo 13º

1. Os órganos de goberno dos referidos centros son, como mínimo, os seguintes:

a) Unipersonais: director, subdirector, secretario, xefe de estudos.

b) Colexiados: consello escolar do centro e claustro de profesores.

2. Ademais contarán cos órganos que se recollan no seu regulamento orgánico, entre os que se contará co responsable da residencia naqueles centros que disponen dela.

Artigo 14º

A participación dos alumnos, pais ou titores legais deles, profesores, persoal de administración e servicios e representante do concello na xestión do centro efectuarase de conformidade co previsto na Lei orgánica 8/1985, do 3 de xullo, reguladora do dereito á educación, a través do consello escolar do centro, sen prexuízo das funcións propias do claustro de profesores.

Artigo 15º

Os órganos de goberno velarán para que as actividades do centro se desenvolvan con suxección ós principios constitucionais, garantía de neutralidade ideolóxica e respecto ás opcións relixiosas e morais dos alumnos e pais de alumnos. Así mesmo velarán pola efectiva realización dos fins da educación e pola mellora da calidade do ensino.

Sección segunda

Da Inspección de Ensinanzas Náutico-Pesqueiras.

Artigo 16º

1. A función inspectora e de control que garanta a calidade das ensinanzas náutico-pesqueiras realizarase a través da Inspección de Ensinanzas Náutico-Pesqueiras, dependente da Dirección Xeral de Formación Pesqueira e Investigación.

2. O conselleiro de Pesca, Marisqueo e Acuicultura poderá encomendar a un profesor numerario a citada función, cesando, mentres dure a dita situación, nas súas funcións docentes e sen que iso implique variación da súa situación administrativa.

Artigo 17º

A Inspección de Ensinanzas Náutico-Pesqueiras realizará as seguintes funcións:

a) Velar pola coordinación dos distintos centros de ensinanza da Consellería de Pesca, Marisqueo e Acuicultura.

b) Velar polo desenvolvemento dos programas e calidade da ensinanza, tanto a realizada nos centros propios como nos adscritos, e dos cursos de formación non regada conducentes á obtención de certificados profesionais.

c) Velar polo cumprimento dos requisitos mínimos esixidos pola normativa vixente para efectos da obtención dos certificados profesionais tanto nos centros propios como nos adscritos e nos cursos de formación non regada que impliquen certificados profesionais.

d) Promove-lo intercambio de experiencias con outras entidades de dereito público ou privado que actúen no campo formativo náutico-pesqueiro.

e) Velar para que o persoal que presta servicios nos centros propios da Consellería de Pesca, Marisqueo e Acuicultura cumpra coas normas que neste campo lle sexan de aplicación.

f) As que, no campo formativo, lles asigne a Consellería de Pesca, Marisqueo e Acuicultura.

Sección terceira

Do profesorado.

Artigo 18º

Quedan adscritas á Consellería de Pesca, Marisqueo e Acuicultura as escalas de profesores numerarios e mestres de taller a que se refiren os artigos 3.3º e 4.3º da Lei 12/1992, do 9 de novembro, de creación de determinadas escalas de persoal funcionario ó servizo da Xunta de Galicia.

Artigo 19º

O réxime retributivo dos funcionarios das escalas citadas no artigo anterior será o establecido para os funcionarios dos corpos de profesores de ensinanza secundaria e de profesores técnicos de formación profesional, respectivamente, destinados en centros públicos dependentes da Consellería de Educación e Ordenación Universitaria.

Artigo 20º

No desenvolvemento das súas funcións os ditos funcionarios estarán sujetos á normativa e réxime xeral do sistema educativo.

Artigo 21º

As funcións do persoal docente son as seguintes:

a) Imparti-las ensinanzas náutico-pesqueiras segundo as modalidades e as materias específicas.

b) Participar nas actividades formativas organizadas polo centro segundo a programación que para tal efecto se aprobase.

c) A asistencia a tribunais de avaliación para os cursos que se imparten nos centros adscritos, así como nos impartidos na formación non regrada.

d) Calquera outra función formativa que lle sexa asignada pola Consellería de Pesca, Marisqueo e Acuicultura.

TÍTULO II

DAS ENSINANZAS REGRADAS NÁUTICO-PESQUEIRAS

Capítulo I

Disposiciones xerais.

Artigo 22º

Correspónelle á Consellería de Pesca, Marisqueo e Acuicultura a elaboración dos plans de estudio e a inspección das ensinanzas náutico-pesqueiras, así como a expedición das certificacións que son requisito indispensable para a obtención do título profesional que habilita para o exercicio das profesións.

Artigo 23º

A formación náutico-pesqueira impartirase nos centros especializados da Consellería de Pesca, Marisqueo e Acuicultura, así como nos centros adscritos, públicos ou privados, de acordo co establecido na normativa en vigor.

Capítulo II.

Dos alumnos.

Artigo 24º

A Consellería de Pesca, Marisqueo e Acuicultura regulará o sistema de acceso ós centros de formación propios, así como as axudas para realiza-los estudos náutico-pesqueiros.

Artigo 25º

A adscrición dos alumnos e a concesión de axudas de estudos realizarase con base en criterios obxectivos a través de convocatoria pública. Para tal fin constituirase en cada centro unha comisión seleccionadora cunha composición e réxime de funcionamento que se determinará nas ordes de convocatoria.

Artigo 26º

Os criterios obxectivos para a admisión de alumnos nos centros propios da Consellería de Pesca, Marisqueo e Acuicultura serán:

a) Criterios prioritarios:

—Rendimento académico.

—Días de embarque (para os alumnos que realicen estudos náutico-pesqueiros segundo o réxime especial de adultos).

—Proximidade da residencia habitual ó centro de formación.

—Irmáns do solicitante matriculados no centro.

b) Criterios complementarios:

—Condición do emigrante.

—Situación de familia numerosa.

—Calquera outra circunstancia susceptible de ser considerada.

Artigo 27º

Os criterios obxectivos para acceder ás axudas de estudos náutico-pesqueiros nos centros de ensinanza dependentes da Consellería de Pesca, Marisqueo e Acuicultura serán:

a) Circunstancias económicas familiares.

b) Expediente académico.

c) Días de embarque (para alumnos que realicen estudos náutico-pesqueiros segundo réxime especial de adultos).

d) Distancia da residencia habitual ó centro de formación.

e) Calquera outra circunstancia obxectiva estreitamente vinculada co sector a que vai destinada a axuda.

TÍTULO III

DA FORMACIÓN NON REGRADA NÁUTICO-PESQUEIRA

Capítulo I

Dos cursos.

Artigo 28º

A formación non regrada náutico-pesqueira poderá impartirse nos centros propios da Consellería de Pesca, Marisqueo e Acuicultura, nos centros públicos autorizados, ou nos centros das entidades colaboradoras que disponan de instalacións e medios materiais adecuados, de acordo co establecido neste decreto e nas súas disposicións de desenvolvemento.

Artigo 29º

1. A Consellería de Pesca, Marisqueo e Acuicultura organizará os cursos de formación non regrada náutico-pesqueira necesarios para a cualificación profesional así como os de formación continua ós traballadores da

pesca, o marisqueo, a acuicultura e de empresas de transformación dos productos do mar.

2. A realización dos citados cursos levará a efecto o persoal da Consellería de Pesca, Marisqueo e Acuicultura ou entidades colaboradoras.

Sección primeira

Dos cursos realizados pola Consellería de Pesca, Marisqueo e Acuicultura.

Artigo 30º

1. A realización dos cursos de formación non regrada, recollidos no anexo II farase por solicitude das entidades do sector sempre que se cumpran as seguintes condicións mínimas:

- a) Que a entidade solicitante estea recoñecida oficialmente como representativa do sector.
- b) Que exista un número de alumnos non inferior a 15.
- c) Que existan aulas e locais coa capacidade mínima para os alumnos participantes, dotados de mobiliario adecuado.

2. Na organización dos cursos poderá considerarse unha excepción ó requisito b) se transcorren máis de dous anos desde que se realizou o último na localidade para onde se solicita o curso.

Artigo 31º

A Dirección Xeral de Formación Pesqueira e Investigación habilitará para imparti-los cursos de formación non regrada náutico-pesqueira os profesores que superen os cursos específicos que se convoquen para o efecto.

Sección segunda

Dos cursos realizados polas entidades colaboradoras.

Artigo 32º

As institucións públicas e privadas que desexen impartir cursos de formación non regrada náutico-pesqueira deberán solicitar o recoñecemento como entidades colaboradoras da Consellería de Pesca, Marisqueo e Acuicultura de acordo co procedemento previsto nos artigos seguintes.

Artigo 33º

O recoñecemento como entidades colaboradoras en formación non regrada náutico-pesqueira requirirá que as institucións públicas ou privadas non teñan ánimo de lucro, presten servicios ó sector pesqueiro e cubran os requisitos mínimos de instalacións e material didáctico que se fixen regulamentariamente.

Artigo 34º

1. O recoñecemento das entidades colaboradoras realizarase por solicitude da entidade, especificando os cursos para os que solicita o recoñecemento e xuntando memoria das instalacións, medios materiais e persoais de que dispón.

2. A Dirección Xeral de Formación Pesqueira e Investigación verifícará que a entidade solicitante cumpla os requisitos mínimos fixados, e elevará a súa proposta ó conselleiro de Pesca, Marisqueo e Acuicultura.

3. Unha orde da Consellería de Pesca, Marisqueo e Acuicultura resolverá o recoñecemento ou denegación da condición de entidade colaboradora, fixando, naquel caso, os cursos que poderá impartir nas súas instalacións.

Artigo 35º

1. A realización dos cursos polas entidades colaboradoras requirirá a autorización previa da Dirección Xeral de Formación Pesqueira e Investigación.

2. Para tal efecto, a Dirección de Formación Pesqueira e Investigación dictará dúas resolucións de autorización de cursos, a primeira en xuño e a segunda en decembro; na primeira resolveránse as solicitudes presentadas ata o 30 de maio e na segunda as presentadas ata o 30 de novembro.

3. Os cursos autorizados en cada convocatoria comezarán no semestre seguinte á resolución; de non comezar neste período considerarase a autorización como decaída.

4. O inicio dos cursos autorizados comunicárselle á Dirección Xeral de Formación Pesqueira e Investigación para efectos de constituirlo tribunal cualificador.

Artigo 36º

Para a realización de cada curso autorizado, as entidades colaboradoras deberán acreditar perante a Dirección Xeral de Formación Pesqueira e Investigación a cualificación do profesor que vaia impartilo.

Capítulo II

Dos alumnos.

Artigo 37º

Para participar como alumno nos cursos de formación non regrada náutico-pesqueira deberán cumplirse os requisitos xerais preceptuados, así como os específicos que se fixen para o curso.

Artigo 38º

A Consellería de Pesca, Marisqueo e Acuicultura poderá establecer bolsas e axudas de asistencia ós cursos

de formación non regada náutico-pesqueira que se realicen nos portos da Comunidade Autónoma galega nas condicións que se determinen regulamentariamente e con base nos seguintes criterios obxectivos:

- a) Nivel de ingresos.
- b) Distancia da residencia habitual ó lugar onde se celebre o curso.
- c) Situación laboral.

Artigo 39º

O cumprimento dos mínimos de asistencia e a superación das correspondentes probas de coñecemento permitirán os alumnos a obtención do correspondente certificado.

Artigo 40º

A Consellería de Pesca, Marisqueo e Acuicultura expedirá os alumnos que superen os cursos de formación non regada recollidos no anexo II o correspondente certificado de exame, e no resto dos cursos certificado de aproveitamento onde consten o número de horas de duración e o grao de coñecementos alcanzados.

Disposición adicional

Primeira.—Créase a Aula de Seguridade e Salvamento como unidade administrativa dependente, a nivel funcional e orgánico, da Escola Oficial Náutico-Pesqueira de Ferrol, á fronte da cal estará o profesor da materia de seguridade marítima.

A finalidade da Aula de Seguridade e Salvamento é a de imparti-la formación en materia de seguridade, supervivencia e loita contra incendios necesaria para adecua-la cualificación do persoal da flota á normativa disposta en aplicación do Convenio sobre Seguridade da Vida Humana no Mar (Sevimar).

Segunda.—Para efectos de ingreso na escala recollida no artigo 3.3º da Lei 12/1992 considérase equivalente para efectos de docencia a titulación de capitán de pesca para impartir exclusivamente a materia de pesca marítima.

Disposición transitoria

Primeira.—Mentres non se publiquen as disposicións de desenvolvemento do presente decreto, mantéñense en vigor os programas e cursos de formación ocupacional náutico-pesqueira que se recollen no anexo III das ordes do 25 de xaneiro de 1989 e do 30 de xaneiro de 1989.

Segunda.—Dentro dun prazo máximo de tres meses a partir da entrada en vigor do presente decreto, a Consellería de Pesca, Marisqueo e Acuicultura publicará as titulacións requiridas para cada unha das materias que deben impari-los profesores numerarios e mestres

de taller recollidos nos artigos 3.3º e 4.3º da Lei 12/1992.

Disposición derogatoria

Á entrada en vigor do presente decreto quedan derogadas as seguintes disposicións:

—Decreto 116/1987, do 14 de maio, polo que se regula a condición de mariscador e se crea o carné de mariscador.

—Decreto 256/1988, do 30 de xuño, polo que se regulan os órganos de goberno do Instituto Politécnico Marítimo-Pesqueiro do Atlántico de Vigo.

—Decreto 330/1988, do 1 de decembro, polo que se regulan os carnés de acreditación en técnicas de cultivos mariños.

—Orde do 15 de xuño de 1987 pola que se regula a obtención do carné de mariscador.

—Orde do 19 de abril de 1988 pola que se regula o curso de formación para a obtención do carné de mariscador.

—Orde do 16 de maio de 1988 pola que se establece o recoñecemento de centros colaboradores en materia de formación e as normas para o desenvolvemento de cursos para a obtención de titulacións menores náutico-pesqueiras e marisqueiras.

—Orde do 25 de xaneiro de 1989 pola que se regulan os cursos, exames e programas para a obtención do certificado de competencia de mariñeiro na Comunidade Autónoma de Galicia.

—Orde do 30 de xaneiro de 1989 pola que se regulan os cursos, exames e programas para a obtención dos títulos profesionais de patrón de pesca local, mecánico de litoral e radiotelefonista naval restrinxido na Comunidade Autónoma de Galicia.

—Orde do 1 de setembro de 1990 pola que se dan normas para a obtención do carné de mariscador.

—Orde do 3 de xuño de 1991 pola que se dan normas para a obtención e revalidación do carné de mariscador.

—Orde do 24 de abril de 1991 pola que se fai de aplicación a Escola Oficial Náutico-Pesqueira de Ferrol o Decreto 256/1988, do 30 de xuño, polo que se regulan os órganos de goberno do Instituto Politécnico Marítimo-Pesqueiro do Atlántico de Vigo.

Disposiciones derradeiras

Primeira.—Autorízase a Consellería de Pesca, Marisqueo e Acuicultura para dictar todas as disposicións que sexan precisas para o desenvolvemento e execución do disposto no presente decreto.

Segunda.—Este decreto entrará en vigor o día seguinte ó da súa publicación no *Diario Oficial de Galicia*.

Santiago de Compostela, dezasete de decembro de mil novecentos noventa e tres.

Manuel Fraga Iribarne
Presidente

Juan Caamaño Cebreiro
Conselleiro de Pesca, Marisqueo e Acuicultura

Decreto 429/1993, do 17 de decembro, polo que se refunde a normativa vixente en materia de actividades pesqueiras de carácter recreativo.

Ó amparo do disposto nos artigos 148.1º II da Constitución e 27.15º do Estatuto de autonomía para Galicia, esta Comunidade Autónoma está facultada para regular as actividades pesqueiras de carácter recreativo, reconecendo os permisos de pesca recreativa emitidos pola Administración do Estado e outros entes territoriais, sempre que se respecten as normas internas da Comunidade Autónoma de Galicia.

De acordo con isto, esta actividade recreativa foi regulamentada a través da orde da Consellería de Pesca, Marisqueo e Acuicultura do 27 de abril de 1983, que regula xenericamente a pesca marítima de carácter recreativo e da do 7 de agosto de 1992, que regula inespecíficamente a pesca submarina.

Razóns de índole práctica aconsellan unificar ámbas dúas disposicións, modificando ó mesmo tempo levemente o contido dalgún dos seus artigos e adoptando un novo rango normativo para axustarse ó disposto na Lei 6/1993, do 11 de maio, de pesca de Galicia (DOG do 31-5-1993).

Esa lei establece que o seu obxecto é regular e ordenar todo tipo de actividade pesqueira marítima, sen prexúfzo das particularidades do réxime de actividades pesqueiras de carácter recreativo, que dispoñerá da súa propia regulación específica.

Tendo en conta que esa actividade se desenvolve no mesmo marco espacial cá actividade pesqueira profesional, cómpre que a regulación e ordenación normativa equilibre os distintos intereses en xogo; por un lado, protexendo o pescador profesional fronte a unha competencia ilexística do pescador deportivo, por outro, preservando a riqueza piscícola das nosas augas, e, por último, promovendo o lexitimo esparexemento dos afeccionados á pesca recreativa que tódalas administracións públicas deben fomentar polo seu interese deportivo e cultural.

Debe ser especialmente obxecto de regulación a práctica da pesca submarina a pulmón libre e a de inmersión con equipos de mergullo xa que o seu uso indebidamente vén convertendo unha actividade simplemente de recreo nunha actividade paralela de explotación comercial cunha incidencia grave en prexúfzo desta última.

Na súa virtude, por proposta do conselleiro de Pesca, Marisqueo e Acuicultura, óido o Consello Galego de Pesca na súa sesión do día trinta de novembro de mil novecentos noventa e tres, e logo da deliberación do Consello da Xunta de Galicia na súa reunión do día dezasete de decembro de mil novecentos noventa e tres,

DISPOÑO:

Capítulo I

Disposicións xerais.

Artigo 1º

O presente decreto ten por obxecto a regulación da pesca marítima de recreo que se practique dentro das augas interiores de Galicia.

Artigo 2º

É pesca marítima de recreo a que se realiza por esparexemento ou deporte e baixo as modalidades de terra, a bordo de embarcación ou submarina.

Artigo 3º

1. A práctica da pesca marítima de recreo require da previa obtención de licencia.

2. A licencia é nominal, individual, intransferible e outórgase por un período de cinco anos a partir da súa data de expedición, sendo revalidable anualmente.

3. O seu outorgamento e revalidación correspónde-lles ós delegados territoriais da Consellería de Pesca, Marisqueo e Acuicultura, logo de presentación da documentación que regulamentariamente se estableza e o pagamento das taxas correspondentes.

Enténdese outorgada ou revalidada a licencia se transcorrido un mes desde a súa solicitude non se notifica a resolución.

4. Dispoñen de licencia especial, logo do pagamento das taxas legalmente establecidas, os titulares de licencias outorgadas por outras administracións públicas territoriais con competencias na materia que pretendan exercer a actividade pesqueira recreativa en augas interiores de Galicia. En todo caso, sonllas de aplicación as normas contidas no presente decreto.

Artigo 4º

1. O volume máximo autorizado de capturas por persoa e día, para calquera das modalidades, é de oito quilogramos nunha ou varias pezas. Non se aplica o dito límite cando a primeira ou segunda peza capturada excede deste.